

Segun linguista Ramon Todd Dandaré

E Caya di Monche ta un buki totalmente ‘nostalgico’

ORANJESTAD – Awe pa 7:30 pm na Biblioteca Nacional Aruba (George Madurostraat) ta keda presente e buki *E Caya di Monche* di e autor Benjaminn Romero. E obra aki ta dedica na e linguista Ramon Todd Dandaré den cuadro di **Aña di Papiamentu 2018**.

Sr. Todd Dandaré a bisa cu e pensamiento pa skirbi riba Elleboogstraat, unda el a yega di biba tempo di su infancia y hubentud, semper tabata t’ey. Elleboogstraat ta e caya cu ta keda dilanti di ex hotel Central y unda awor tin e parkinglot grandi ta cas tabatin construi. Ya e casnan aki no ta existi mas for di aña 1955, nan a wordo basha abou pa traha e sitio di parkeer aki. Tur hende a sali for di e barío bay.

E ta conta cu e barío tabatin un historia cu ta aparece den *E Caya di Monche*. E ta un “historia hopi típico. Hopi folklorico y tambe cultural



hunto.” Loke e ta considera importante ta cu e buki aki ta rescata e historia aki.

E ta haya cu ora bo ta skirbi un buki y den e caso aki e autor Romero a asumi e tarea

aki, caminda a base di Todd Dandaré su informacion, e por traha gran parti di e obra aki. Pero e ta abarca informacion di hopi mas hende.

Tambe e buki ta conta e manera cu nan tabata biba na Elleboogstraat. E barío aki tabatin un sistema di cas caminda tabatin un solo cura y den e cura ey bo ta haya

varios cas rond di dje. Un cura comparti pa diferente famia, unda un famia ta cushina algo pase pa e otro. “E diferente famia tabata biba manera famia di nan mes,” el a bisa.

E ta haya cu e buki ta importante pa e Aruba di awendia por conoce parti di e Aruba di antes, con nos tabata biba cu otro riba e isla aki. El a agrega cu e buki aki ta rescata for di olvido hopi cos cu no ta existi mas. P’esey e ta describi *E Caya di Monche* como un buki totalmente ‘nostalgico’.

Entre e parti interesante cu e linguista ta menciona y cu ta aparece den e buki *E Caya di Monche* ta con Todd Dandaré como mucha cu a caba MULO, cu no ta existi mas na Aruba tampoco, a bay Lago cu tampoco ta existi mas, y el a subi ariba un tanker pa bay Europa. Y sin niun sorto di ayudo di Cas di Aruba, e so a yega Hulanda y habri su caminda.